

SAN JUAN

ISKAIMA KARTA

KACHASKAMANDA

¹Nuka, Jesuswa tukuskapura iacha taita kaspá, Taita Dios agllaska mama panita i kamba wambrakunatami kai karta kachaikichita. Sutipami kamkunata suma *kuiaikichita. Mana nukalla *kuiaikichitachu. Sutipa Alli Willaita tukui rigsikunapasmi kamkunata *kuiankuna. ²Nukanchi sutipa Alli Willaita iuiapi charispami kamkunata *kuiaikichita. Chi sutipa Alli Willaika, diltudupami nukanchiwa kangapa ka. ³Taita Dios i Jesucristo, Taita Diospa wambra kaspá, kamkunamanda llakirispá, kamkunata kuiaspá, suma iuiaiwa kawapuchu; chasaka, sutipa Alli Willaita charispá, *kuianakuspa kaugsangapa.

Sumaglla kikinpura *kuianakuspa kaugsangapa iachachiskamanda

⁴Kamba maikan wambrakuna, Taita Dios imasa niskasina sutipa Alli Willaita charispá, allilla kaugsanakugta kawaspaka, askurintimi alli iuiachiwarka. ⁵Kunauraka, mama pani, mañaikimi, nukanchipura *kuianakuspa kaugsangapa. Chasa niskawaka, musu mandaika mana niraianchu. Chi mandaitaka kallarikauramandatami iukarkanchi. ⁶Kuianakuika niraianni Taita Dios imasa niskasina ruraspá kaugsanakungapa. Kamkuna imasa ñugpamandata uiaskasina niraiaskata iukangichimi *kuianakuspa kaugsanakunga.

Llullaspa iachachigkunamanda

⁷Ikuti llullaspa iachachigkunaka, achkakunami kai alpapi purinakú. Paikunaka, llullaspa ninkunami: “Jesucristoka, aichaiug runa tukuspa mana kai alpama samurkachu”. Chasa nigkunaka, Cristomanda llullaspa, paita mana munagmi kankuna. ⁸Kamkuna suma iuiaripuangichi, kamkuna alli ruraikunamanda apamunakuskata mana kichui tukungapa. Chasaka, Taita Dios ima karangapa kaskata, tukuimi chaskinkangichi.

⁹Maikanpas Cristo ima iachachiskata sug rigchata *ialigta iachachigkunaka, Taita Dioswa mana kankunachu. Ikuti Cristo ima

iachachiskallata katigkunaka, Taita Dioswa i paipa wambrawapasmi sugllasina kanchi. ¹⁰Maikanpas kamkunapagma chaiagrispa, Cristo ima iachachiskallata mana iachachigpika, *mana chaskingichi. *Mana paita: “Puangi” ningichi. ¹¹Maikanpas chi llullaspa iachachigkunata: “Puangi” nigpika, chi llullagkunawami tukugsamú.

Kaiakama, niskamanda

¹²Kamkunata achka ningapa iuiakuspapas, mana munaikichitachu iskribingapa. Chasapaka, iuiakunimi kamkunapagma chaiagrispa, ñawi ñawi rimanakungapa; chasaka, nukanchi tukuipi suma alli iuiachiiwa kangapa.

¹³Taita Dios agllaska kamba ñaña wambrakunapas, kamtami: “Puangi” ninakú.